

Lun 20 a viz Gwengolo 2021,
Gwened

Skoazell kadarnaet adarre da yezhoù Breizh Un eil lise Diwan zo nevez-digoret e Gwened, gant skoazell ar Rannvro

Evit ar Prezidant Loïg Chesnais-Girard, « *ur bazenn a bouez eo an digoradur-mañ, ken gortozet ma oa gant ar rouedad Diwan, Rannvro Breizh hag an holl dud a vez o tifenn ar brezhoneg* ». War-lerc'h bezañ prenet savadur ar skolaj kozh Montaigne he deus lakaet ar Rannvro adkempenn an diabarzh, abalamour d'al lise nevez da c'hallout degemer an 200 skoliad kentañ e distro-skol miz Gwengolo : 27 lisead en Eilvet ha Kentañ hag ivez 173 a skolajidi hag a oa « lojet » betek-henn er skol bolis kozh a zo e-kichen. En amzer-da-zont e c'hallo al lise-skolaj Diwan nevez degemer 460 a skolidi ha 60 a gelennerien d'ar muiañ.

Betek-henn e oa ret d'ar skolidi a oa bet en unan eus ar **6 skolaj Diwan** e Penn-ar-Bed, Aodoù-an-Arvor, er Mor-Bihan hag el Liger-Atlantel, mont da **lise Karaez**, a zo perc'hennet gant Rannvro Breizh ivez, evit delc'her gant o studioù brezhonek. Diwar vremañ e c'hall ar **skolajidi eus kreisteiz ha reter Breizh** delc'her gant **o zreugad dre soubidigezh e Gwened**. Hetañ a ra ar Rannvro dezho ober berzh evel o c'halmaladed e Karaez (**100 % anezho o doa tapet o bachelouriezh** e miz Mezheven ur wech c'hoazh).

Evit prenañ al lec'h a oa **vak abaoe 2016**, adkempenn ar savadur pennañ (kelenn, melestradurezh, preti) **5 100 m² ha 3 live** dezhañ, ez eus bet lakaet **6,5 M€** gant ar Rannvro *6501 al lizher chanter* evit gouzout hiroc'h war al labourioù dre ar munud).



Dav eo lavaret eo chomet ar **skol-lojañ** e-barzh ar **skol bolis kozh** a zo perc'hennet gant an Departamant. Emañ henezh oc'h ober **labourioù** eno er mareoù-mañ, gant sikour arc'hant ar Rannvro, abalamour da c'hallout lojañ **250 skoliad a-benn an distro-skol e miz Gwengolo 2022**, pa n'eus nemet **100 plas betek-henn**.

Ar Rannvro, ur skoazellerez divrall d'ar rouedad Diwan



Adalek ar penn kentañ e vez skoazellet Diwan gant Rannvro Breizh evit a sell ouzh mont en-dro ar gevredigezh hag he rouedad kelenn he deus kaset miliadoù a vugale divyezhek betek ar vache-

louriezh e-doug ar 45 bloaz tremenet.

Er bloaz-mañ e vez degemeret **4 034 a skolidi** gant ar rouedad-se a zo **laik ha digoust**, e-barzh **48 skol, 6 skolaj ha 2 lise**. E-barzh al lise e **Karaez**, e Kerampuilh, ez eus **280 a skolidi**. Er mareoù-mañ, kement ha gwellaat an endro deskiñ ennañ, emañ ar Rannvro oc'h ober **labourioù** evit kreskiñ anezhañ (**4,5 M€**).

Suraat ar rouedadoù kelenn

« *Enoret ha kreñvaet e vez hor Republik gant he liesseurted, a fell da Brezidant ar Rannvro adlavaret. E Breizh e vennan ma c'hallo pep hini deskiñ ur yezh rannvro, choaz ar rouedad hag an doare kelenn a garo* ».

Montaigne, al lec'h kreiz da zont e Kergadoù

War ar memes tachenn e lec'hienn Montaigne (20 000 m² en holl) ez eus **daou savadur all da vezañ adkempennet**.

En hini kentañ, **1 400 m²** dezhañ, e vo staliet skipailhoù **Skourr Tiriadel Kreisteiz Breizh**, da lavaret eo **un daou-ugent bennak a wazourien** eus pep servij eus ar Rannvro, hag a zo staliet betek-henn e Gwened, e straed Saint-Tropez.

Evel-se e vo gallet **lakaat muioc'h perzh ar Rannvro war wel** e-kichen servijoù publik hag aveadurioù all, ha kempenn al lec'h evit **degemer an dud**.

En **eil savadur** e oa lojeizoù karg, 700 m² dezho, d'ar mare ma oa ar skolaj. N'eus ket bet divizet c'hoazh penaos e vo implijet.

War ar memes tro emeur oc'h ober ur **studiadenn gêraozañ**, goulennet gant Ti-kêr Gwened, **diwar-benn karter Kergadoù**. Lakaet eo bet al **lise AR-Lesage**, a zo nepell ac'hano, da gemer perzh er preder-se, seul vui m'emañ ar Rannvro e-sell d'ober **labourioù adkempenn bras ennañ war-lerc'h 2024**.